

Guh Saehndei

□ Cungh Yujingh / 钟汝荆

Gwnz haw Nazheuj miz daegcoz ndeu, vunz hungsang noh saedgt. De iq haengj dingq bouxlaux gangj goj Suijhuj, goj Samguek, ngoenznaengz manzgyaengj gyaез gangj ngeihheiq. Caengz ndaej 20 bi couh baenz boux bouxdauez gyoengq daegmbauq gwnz haw, vunz heuh de guh Gocieng.

Bohmeh guenj mbouj ndaej de, couh ra daxlungz ndaw budui bang soengq de bae dang bing, muengh de ndaej youq budui gaij giz rwix bae.

Hoeng, duzma gaij mbouj ndaej gwn haex, Gocieng bae daengz budui hix mbouj dingq son'gyauq. De ndangdaej ndei gvaq bouxwnq, hix mbouj lau deng fad.

Miz baez he, Gocieng siengj bae ranz yawj dahyoux, lingjdauj mbouj hawj de cingjyaj, de couh naemj aen geiqmaez he okdaeuj.

Dingjlingz gvaq geij ngoenz budui yaek guh yienjlien, Gocieng couh cang baenzbingh iugouz youq ndaw rug yietnaiq. Gyoengq doengzdoih ngamq ok bakdou, de couh buet bae caeuq dahyoux doxraen lo!

Vansisi guhcaemz sam ngoenz le, de cacaemj dauqbae ninz youq gwnz congz caj gyoengq doengzdoih dauqma.

Vahbyangz ndei dwg ndei, saek seiz rox deng laeuh. Ngoenzhaenx de naengh banci dauq, cingqngamj bungz miz vunz dawz mid ciengj ngaenz! Gocieng hozndat raixcaix, ndawsim ndaq nauez: "Duzfangz raq neix, gingqyienz dangqnaj gou guh yak, ra dai!" Hwnjbae geij gaemxgienz couh gaemh ndaek vunzrwix caemhcaiq cug fwngz hwnjdaeu, daengq hawj gyoengqvunz soengq vunzrwix bae baicuzsoj le couh gaenjgip buet ma budui.

Gyoengqvunz gwnz ci cungj yawj ndaej da daengx bae, caj caezgya roxsingj gvaqdaeuj, boux yinghyungz gaemh bouxcienjingaenz gaenq buetdeuz lo!

Gocieng dauq daengz ndaw rug ngamq hwnj congz cang ninz, lenzcangj hix riengzlaeng dauqma daengz lo, caen yungyiemj ha, ca di couh deng byoengq lo!

Geij ngoenz gvaqbae le, bang

vunz he daeuj daengz bakdou budui, roq gyong roq laz, boux baihnaj lij gaem miz mbaw geizman he, gangj nauez yaek soengq hawj boux gaijfangginh dungzci gaemh bouxcienjingaenz.....

Lenzcangj moengj lo, coh gyoengqde nauez: "Geij ngoenz neix dou cungj okbae yienjlien, mbouj miz byawz ndaej haeuj ndaw singz bae, sou gauj loek luba?"

Gyoengqvunz nyengh nauez: "Dou rox sou gaijfangginh guh saehndei mbouj haengj lwnh coh, hoeng, dou cingq caz cingcuj le cij gamj daeuj ne!"

Lenzcangj naemj yaep he, lumj rox dwg byawz lo, heuh geij boux bing nyengh ram Gocieng okdaeuj.

Gocieng baez yawj aen ciengzmienh neix, rox mbouj ndei lo, sikhaek naiqniek lumj cingq baenzbingh nei.

"Dwg lo, dwg lo, couhwdg de lo!"

"Gyoengq beixnuengx ha, sou caen nyinh loeng vunz lo? Dwg gou

guh maz ne?" Gocieng lij cang ngawz cam.

Gyoengqvunz dingq le engqgya gamjdoengh, boux gaijfangginh neix caen ndei ha! Vihliux vunz lai mbouj lau yungyiemj gaemh vunzrwix, doeklaeng lij mbouj nyienh aeu mingzdaeuz.

"Couhwdg mwngz."

"Couhwdg mwngz, dou mbouj rox nyinh loek!"

.....

Gyoengqvunz mwngz coenz gou coenz hemqsiagsieg.

Lenzcangj dinghdwd yawj coh Gocieng. Gocieng sim diuqbubbub, gag naemj: "Mbatneix dai dahraix lo!"

Doeklaeng Gocieng ndaej laeb samdaengjgoeng, mbaw ciengjjang ngamq fat daengz fwngz mbouj geij nanz, de couh deng lenzcangj gyaeng sam ngoenz, youq ndaw rug mbouj ndaej gwnndoet doxgaiq. Gocieng caen simfanz lo, dauqdaeuj guh simndei deng mbouj deng ne?

Gvaq le haujlai bi, ndaw budui lij cienzgangj aen goj neix ne!

Fwen Dang Aencingz Bohmeh

□ Lij Soujhan / 李守汉

Lwnh gak boux beixnuengx,
Haibak cuengq sing coenz,
Guhhong caen deng boenq,
Hoeng aeu hauq bohme.

Raeuz cungj haeujsim geiq,
Bohmeh ndei daih'it,
Gij doenghgo ndaej did,
Aeu baengh miz ndit dak.

Vihmaz gingq bohme,
Bouxgeq lwnh hawj raeuz,
Daj doekfag okdaeuj,
Songde nyaengq gaeuz lwg.

Doegsaw ndaej roxleix,
Daengq raeuz aeu ndaejgeiq,
Raeuz lij caengz okseiq,
Meh geix le gouj ndwen.

Mwh mizndang ndawde,
Meh gizgiz siujsim,
Deng rueg dungx mbouj imq,
Cix vuenheij rim hoz.

Caibak geijlai ndwen,
Dangbouj ywenj nyaenxheiq,
Daengz seng raeuz doekdeih,
Lij feiq rengz cij lwg.

Ngamq seng raeuz okdaeuj,
Meh haeux mbouj nyienh gwn,
Ndang naiq mbouj ndaej hwnq,
Fwngz umj lwg lox ninz.

Seng le youq ndawndwen,

Lwg gwq swenjoen'oen,
Haeujsim ganq baenzngoenz,
Lwg noengq meh cix byom.

Seng raeuz caengz rim ndwen,
Gwen denz roengz din naiq,
Ndangnyieg yaep couh baiq,
Yamqdin byaij mbouj baenz.

Seng raeuz ndaej geij ngoenz,
Ndang yungz baenz daeuhfouh,
Mboujlwnh deng maz souh,
Meh cungj mbouj lwnh bak.

Gyangngoenz mbouj ndaej naengh,
Daengz haemh mbouj ndaej ninz,
Lwg daej sim youh in,
Laeng ing umj lox lwg.

Meh caenhsim bae ndiep,
Baez iek meh couh cij,
Ndaw rungj lwg lij iq,
Bizlolo ndeigyaez.

Siq nyouh youh siq haex,
Beij cae naz dwgrengz,
Gyanghwnz daengz sam geng,
Vanzlij deng cij lwg.

Bwnq cij youh bwnq haeux,
Siq haex nyouh uet myaiz,
Laihnaeuz lwg gag gvai,
Meh geijlai sinhoj.

Uet mug youh uet myaiz,
Uet geijlai gvaqdaeuj,



Dahsau Daegmbauq eu fwen rwenz raeuh.

Dozsw

Bwnq cij youh bwnq haeux,
Haeujsim ganq raeuz hung.

Ok nyouh youh ok haex,
Ngoenz fugsae hae geij baez,
Sinhoj raemxda lae,
Cungj mbouj ndaej yietnaiq.

Siq nyouh youh siq haex,
Mbouj rox gyaез geijlai,
Uet mug youh uet myaiz,
Feiq geijlai saenzheiq.

Doeklaeng menh majhung,
Bwnq gijmaz cungj haengj,
Rox ruenz youh rox naengh,
Umj aemq caenh dwgrengz.

Daengz rox ruenz rox naengh,
Meh haengj youq henz fuz,
Uet mug mbouj yiemz uq,
Buh hinj meh dajsaeg.

Lwg miz saekdi bingh,
Simvueng doq dingh roengz,
Coh yihyen bae soengq,
Lwg ndei cij soengheiq.

Bohmeh hwnz caeuq ngoenz,
Caenh fanzsim feiqheiq,
Faex laux aeu dem ngeiq,
Muengh lwg geiq bohme.

(*caengz sat*)